

Tres pilar di show y espectáculo a bay den un siman

THOMA Y TRIO QUISQUEYA: Diadomingo cu a drenta e informacion cu Hendrik "Didi" Wernet a fayece, a drenta den mi memoria mes ora e pensamento: **"ta tres figura grandi a bay den un siman"**.

E prome tabata Thomas "Toma" Lake, ex chofer di autobus.

E generacion cu a nace di 1960 en adelante, kizas nunca a tende di Thoma, pasobra e periodo cu su nomber tabata grandi, tabata entre 1955 y 1970, caminda cu sigur mayoria di hende tabata conoce, no como chofer di autobus, pero e cantante formidable di **"Trio Quisqueya"**. Hunto cu George Maxwell (q.e.p.d.) y si mi no ta equiboca, Duinkerck o Arduin, e tabata artista popular cu e trio aki.

Na tur emisora por a scucha Trio Quisqueya riba diadomingo, na picknicknan, na fiestanan di familia, den shownan musical, Trio Quisqueya mester tabata eyan cu nan musica estilo **"Matamoros"**.

E trio aki tabata tin un repertorio di Matamoros cu interpretacion asina bon cu bo por hasta equivoc den e trionan aki.

Te corto tempo pasa ainda Thoma tabata toca y complace durante un of otro celebracion y semper cu su cancionnan di Añoranza.

Esnan cu a conoce y su trio, sigur no por scucha por ehemplo **"Son de la loma"** sin pensa riba Trio Quisqueya y mira Thoma y su compañeronan su dilanti.

SILVIO MULLER E HOMBER DEN BACKGROUND: E otro persona cu siman pasa tambe a laga nos, tabata Silvio Muller.

Silvio tabata esposo di esun cu a ser considera como e reina di paradanan di carnaval di Aruba, Sidonia Muller(q.e.p.d.).

Silvio tabata e pilar y forza tras di Sidonia y su grupo y semper a keda den **"background"**.



Nunca e kier a bin dilanti, y manera su hobby, tabata sconde cara den motor di auto. Silvio cu tabata gasta su salario pa Sidonia por a presenta manera un reina den carnaval. Silvio cu tabata traha duro den e grupo pa duna e mihor presentacion riba caya.

Silvio cu tabata cla pa yuda tur hende sea bo ta na Baby Beach of na Faro di California,

e ta sali pa yudabo cu bo auto.

Semper keto, y masha jovial.

Den tur skina e tabata conoci y tabata tin hendenan cu ta apreci'e.

E nunca a busca popularidad, pero tabata popular pa e personahe cu e tabata.

Despues di fayecimento di su señora el a yuda Tutu Rasmijn cu su grupo di carnaval y cual grupo tabata consisti di participantenan di Sidonia, di Tutu y cual grupo su rama a plama pa Esso y awendia Coastal.

Algo cu hopi hende no sa tabata cu e tabata un Bloedonnor grandi y su sanger tambe a yuda hopi riba nos isla den transcurso di añanan.

Un característica tambe di Silvio tabata cu a pesar cu e tabata biba ultimo temponan te na Eagle, e no por a keda sin bay San Nicolas tur dia.



Riba e tereno di e **"show di carnaval"**, Silvio tabata un di e topartistanan cu nos isla a conoce.

DIDI WERNET CANTANTE DI PLACER: Didi Wernet nunca a carga idea di ta gran cantante, o gran compositor.

E por gana un festival y perde 1000 y semper el a keda e mes Didi, cantando pa placer, pa deleite di esnan cu kier scuche y cu ta scuche.

Manera un explosion nuclear e noticia a drenta diadomingo mainta cu Hendrik **"Didi"** Wernet a fayece na Colombia.

Un cantante cu tabata presenta den tur sorto di concurso o competencia, pa gana of perde, pero cu intencion di deleita su audiencia.

Anualmente e tabata den Concurso di Tumba, te cu el a logra e corona cu **"Bida"** cu a keda awor como un di e clasiconan di carnaval.

Ultimo añanan, Didi tabata e pareha musical di Chicho Kock, y e pia di trio musical combina cu Tuyo Herrera y Cocoloco Band. Ora di festivalnan, si Didi tey, ta cu cancionnan componi y aregla hunto cu Chucho o Chucho hunto cune, a aregla hunto cu Tuyo, Chucho y toca pa Cocoloco Band.

E amigonan aki cu a logra conversa cu Didi ainda prome cu su fayecimento, ya cu Didi a yama tur su amigonan for di Colombia pa manera **"despedi"** di nan ultimo dianan.

El a corda riba tur su hendenan.

Didi a wordo critica y elogia den su vida.

Esnan cu a critica su persona pa un of otro show, por bisa awe, cu nunca Didi a reprocha nan nada.

Mi mes a yega di critica Didi, sperando mihor di dje den su presentacionnan etc.

Nunca el a menciona un palabra den defensa, rabia of trata di saca culpa.

El a actua manera un personahe publico ta actua y ta keda tratabo cu e mes cariño di semper.

Esaki el a pasa aden como sindicalista di e sindicato di Elmar, como politico di e partidonan den cual el a milita y como legislador di nos isla.

Fuera di concurso di tumba, Didi no por a keda afo di concurso di Dande ni concurso tipico.

Dia 18 di maart Didi ta presente pa laga su voz resona.

Ora di actividadnan grandi, Didi mester tey pa canta.

Den ASOMA ultimo añanan, el a traha duro den combinacion cu Elgin Yudan, Nelis Winklaar y Mechi Croes pa bienestar di e asociacion y su miembronan.

Den periodo di carnaval, principalmente e concursionan musical, su cas tabata solamente pa drumi debi na e cantidad di trabaonan **"pa cual no tin gratitud"** cu tabata tin e ocupa dia y anochi.

Mundo musical, tanto tipico como contemporaneo, lo haya falta di Didi, e cantante cu tabata canta pa placer y pa deleite di su audiencia.

Canta malo o canta bon, semper el a keda Didi sin ningun idea di artista den su cabez y e mes trato na cada persona sin distincion di nada. **Didi, homber di folklore y di cultura Arubano.** Esey tabata **"nos Didi"**.

Juby

